

Vunzlai Maijyawj Dem Haenh- ndei Sibinz Fwen Yenzswngghdai

原生态山歌视频引起强烈反响

Vihle swncienz nem daihlig fatyengz gij vwnzva eufwen maenhndei minzczu ndawbiengz Guengjsae raeuz, vih seizdaih moq seveicujyi gensez fuzvu, fungfouq gij hozdung neiyungz 2016 nienz “sam nyied sam Bouxcuengh”, baijok mienhmauh moq vwnzva minzczu Guengjsae mwnhoengh nem minzczu doxgiet, gaengawq gij anbaiz Sweigih Minzvej, Yozvei Eufwen Guengjsae nem Guengjsae Sam Nyied Sam Cazcise boiqhab Guengjsae Densidaiz sinhvwnz binzdau (sinhvwnz cungsim) loegguh sibinz fwen yenzswngghdai Guengjsae, cujiz gij fwenvuengz, canghfwen Cuengh, Gun, Yiz, Gingh seiq aen minzczu ndaw gih gungh 24 boux comz youq Guengjsae Vwnzvuzyen loegguh cietmoeg, gij cietmoeg neix youq 2016 nienz “sam nyied sam Bouxcuengh” geizgan book, sou ndaej yaugoj ndei.

3 nyied 30 hauh, Yozvei Eufwen Guengjsae daj Namzningz, Liujcouh, Laizbinh, Fangzcwngz, Hozciz, Bak-saek daengj si cingj gyoengq canghfwen maenhndei Cuengh, Gun, Yiz, Gingh daengj minzczu ndaw gih gungh 24 boux, comz youq Namzningz, loq guh beizyin le, youz boux daujyenj densidaiz nem lauxhangz fwen daengq gij saehcingz mwh loegguh cietmoeg aeu louzsim de, caiq saemjcaz simjdingh gij goswz dem yaemlwd eu fwen. 3 nyied 31 hauh, Guengjsae Densidaiz baenz 10 boux gunghcoz yinzyenz youq Guengjsae Vwnzvuzyen ndabaij le sam aen sezsienggi loegguh cietmoeg. Aen cietmoeg loegguh neix miz fwen Bouxcuengh Gveisaebaek 《Minzczu Doxgiet Va Haihoengh》《Ngoenzneix Angqhoh Sam Nyied Sam》; fwen Yizcuz Nazboh 《Gouz Fwen Roeb Daengz Seizcin Ndei》; fwen Ginghcuuz Fangzcwngz-gangj 《Fwen Couxhek Ginghcuuz》; Fwengun Gveicungh 《Mehmbwk Vuj-senh Caiq Caeuq Goenggeq Liujcouh Doiqfwen》 daengj. Gij neiyungz baugvat minzczu doxgiet, gekleiz doxhuz, ndawranz huzndei, mbanj moq seveicujyi, ak nungz vei nungz, gajnde minzswnggh, fwenyox conzdungj, fwen fungsug, fwen lijiz daengj, yungh Vahcuengh, vah Ginghcuuz, vah Yizcuz nem Vahgun daengj vah gak dieg daeuj yienjciengq. Gij fwen neix yaemlwd sepset ndeidingq, goswz sohseid, swhyienz, caensaed, funghgwz lajmbanj noengznwd, gezgou fwen dinjiq, funghgwz yaemlwd huzndei, goswz genjdanh yungzheih geiq, ciengq hwnjdaej caemh yungzheih dawzbak,



▲ Canghfwen Guengjsae Sam Nyied Sam Cazcise cingq ciengq Fwencuengh Gveibaek 《Minzczu Doxgiet Va Haihoengh》.

gij fwen neix hix fuengbienh riuzcienz. Gya hwnj gij fwen neix neiyungz lai cungj lai yiengh, gengangh gaenxmaenx, yisuz hingzsiak biujyienh gak cungj gak yiengh, ndigah gij fwen neix fanjyingj le gak fuengmienh Guengjsae ndawbiengz saedcej hingzsieng sengdoengh nem laegdaeuq.

3 nyied 31 hauh, Guengjsae Densidaiz sinhvwnz binzdau (lanzmoeg Sinhvwnz Caisen) aeu 《Sam Nyied Sam Bouxcuengh Minzczu Fungh Betgvei—Fwenvuengz Gak Cuz Caez Comz Namzningz Mehmbwk Vujsenh Caiq Caeuq Goenggeq Liujcouh Doiqfwen》 guh daez, bocuengq le siusik loegguh fwen yenzswngghdai, hix yiengq vunzlai daezgonq book le cietmoeg siennaueuz, yinx vunz dawz aen cietmoeg neix geiq haeuj sim. Guengjsae Minzczu Bause boux fusecangj he youq ngoenz daihngieih aen cietmoeg book haenx raen boux canghfwen camgya cietmoeg he, couh doiq de gangj gij sim' angq bonjfaenh: “Ngoenzlwenz banhaemh gou youq gwnz densi yawjraen gyoengqsou lo, gij cietmoeg neix yungh Vahcuengh senhconz le vah saw minzczu, gig miz daegsaek, ndei raixcaix ha. Danghnaeuz boux mehmbwk Vujsenh caemh yungh Vahcuengh daeuj ciengq, couh engqgya miz daegsaek lo.”

4 nyied 9 hauh (liggaeuq sam nyied cosam), haj aen cietmoeg loegguh haenx youq “cizbo hung 2016 sam nyied sam” (daiz doiqfwen) cienzboh book, Guengjsae Veisi,

Guengjsae Sinhvwnz Binzdau, Gozci Binzdau, Anhveih Gunghgung Binzdau, Gvangjdungh Gvangjibo Densidaiz Sinhvwnz Binzdau daengj caemh book, hawj aen cietmoeg neix ndaej bocuengq daengz cienz seiqgyaiq, sou ndaej yaugoj ndei, gak dieg bingzlnh ndei lai lumj daihhaj fan langh.

Ganhsuz Ciujcenz bouxyawj youq gwnz veihsin sij daengz: “Siengj mbouj daengz singfwen Bouxcuengh baenzneix ndeidingq, gvaqlaeng miz gihvei itdingh bae Mbanjcuengh yawjyawj. Mbouj yungzheih dingqny Fwencuengh baenzneix ndeidingq ha. Gou maqmuengh lai ok cozbinj lumj yiengh ndeidingq neix. Caiq hohfuk Fwencuengh ciengq doh daengx seiqgyaiq, okmingz daengx seiqgyaiq.”

Cunghgoz Sevei Gohyozyen boux lauxhangz yenzgiu singhag haenx youq gwnz veihsin sij daengz: “Gou dwg lwg Mbanjcuengh, youq dieg rog dingqny gij fwen raeuz gig ndeidingq, sim maezlien youq ndaw haijfwen, ndawsim gamjdaengz gig caenciet nem raeujrub”

Yinghgoz Lunzdunh bouxyawj singq Fangh haenx youq gwnz veihsin sij daengz: “Fwen Guengjsae caen ndeidingq, gou gig haengj dingq bw.”

Yizbwnj Dunghgingh bouxyawj singq Loeg haenx youq gwnz veihsin sij daengz: “Dingq daengz fwen Bouxcuengh, caen mbouj loek ha.”

Boux vangjminz Veiz Lenzdungh youq gwnz veihsin sij daengz: “Gij

diuh fwen lauxgeq nem angqyangz, cungfaen yienh' ok le vwnzva daejgiek nem dungxcaiz noengznwd gyoengq canghfwen! Dang ndaej hwnj fwenvuengz ha! Caensim hohfuk Fwen cuengh ndaej louzcienz ciengxlwenx.”

Boux vangjminz Caijyih youq gwnz veihsin naeuz: “Cuj fwen Bouxcuengh ciengq haenx gij yaemlwd de caen ndeidingq, ciengq ndaej caemh ndei raixcaix.”

Boux vangjminz Cunhciehveih youq gwnz veihsin naeuz: “Yienznaeuz gou gangj Vahcuengh, danhseih lumj yienghneix miz binjci haenx gaxgonq gou mbouj dingqny gvaq, gij fwen neix gig miz caengzmbaekgamj. Danghnaeuz ndaej lumj Liuz Samcej yienghhaenx youq gyang byaraemx doiqfwen, caemh mbouj loek bw.”

Boux vangjminz Yenzzenz youq gwnz veihsin naeuz: “Daiq ndei lo, gij fwen ndeidingq neix biujyienh le gij fungsug saenzcingz Bouxcuengh raeuz, bietdingh aeu dawz gij ginghdenj neix swncienz roengzbae.”

Ceiqgaenh, vunz Cunghgoz Meijgoz ciz Cai Beizgangh daj Meijgoz Niujyoz hawj Guengjsae Sam Nyied Sam Cazcise geiq daeuj bien bingzlnh dinj ndeu, biujdap le gij simcingz gikdoengh boux vunzlaux neix yawj sibinz gvaqlaeng de:

Gij sibinz neix yiengq cienz seiqgyaiq bocuengq, hawj vunz gak dieg engqgya yungzheih nem cigciep rox gij vwnzva minzczu Cungguek, minzczu doxgiet dem sevei huzndei, ndei raixcaix ha. Gou simmuengh sibinz lumj yienghneix ndaej laebdaeb loegguh roengzbae, caiq daihlig cienzboq.

Caensim docih gyoengqvunz loegguh sibinz nem boux camgya eu fwen haenx, daiq hawj raeuz haujlai angqyangz. Gou aeu eu geij coen fwen daeuj biujdap gij cingznaek docih gou:

Dwen daengz Sam Nyied Sam,
Nanzlumz lo ciuhvunz;
Hawfwen comz beixnuengx,
Seiqfueng rwenz sing fwen.

Nanz lai youq Niujyoz,
Hawfwen hoj ndaej bae;
Hawj gou siengj ndaej maez,
Seiqseiz fangzhwnzloq.

Sibinz ranzmabanj daeuj,
Gou simhai lumj liengj;
Yawj fwenvuengz eu fwen,
Ngoenzmaz siengj ndaej lumz.
(bien faenzcieng neix youz
Yozvei Eufwen Guengjsae hawj)